

Ina chapellada per la GSoA

Autocritica dals iniziants e cuntentientscha tar ils adversaris

■ (anr/vi) **Passa 70 pertschient dals votants refusan l'iniziativa per abolir il servetsch obligatoric. Igl è ina frida solemna per ils iniziants da la GSoA. Suenter la votaziun dad ier para l'armada svizra dad esser en ina posiziun ferma pir che mai.** «L'obligaziun da far servetsch è enragischada pli ferm en la populaziun che quai che nus avain quinta», di *Jo Lang* da la Gruppa Svizra senza armada (GSoA). I saja dentant er ina dumonda dal temp. Er il dretg da votar per dunnas hajan ins l'emprim refusà a l'urna ed intgins onns pli tard ditg gea.

Problematic per l'iniziativa saja stà che las forzas sanestras na sajan betg stadas persvadidas da l'iniziativa, ha i gi num ier tar la GSoA.

«Ina terrada per la giuventetgna»

«Nus n'avain betg dumagnà ils giuvens a l'urna», di *Lena Frank*, co-presidenta dals Giuvens verds. La refusa saja ina terrada per la giuventetgna. Ins na saja betg vegni a riva da mussar quant impurtant ch'il project saja per la generaziun giuvna.

Ins na dastgia dentant betg smetter da s'engaschar per quest intent. Sco proxim stoppian ins procurar ch'il servetsch civil saja avert per tuts.

En la medema crenna dat *David Roth*, president dals Giuvens socialist: «Nus giavischain ch'ins possia far pli tgunsch servetsch civil e che la gliעד na vegnia era betg pli discriminada.» Il na dastgia betg esser ch'ils «civils» vegnian chastiads cun servetschs pli lungs.

Lucas Caduff: «Ademplir nosa missiun»

Brigadier *Lucas Caduff* è fitg cuntent cun l'esit da la votaziun. «Cun mantegnair il sistem da milissa po nosa armada ademplir er en l'avegnir sia missiun.» L'obligaziun da far servetsch garanteschia ina buna maschaida culturala e sociala da la schuldada. Tuts giuvens svizzers cun da tuttas sorts abilitads prestian servetsch. Il sistem da milissa garanteschia la controlla democratica entaifer l'armada.

Il proxim pass planisà per sviluppar l'armada saja da reducir il temp da recruta sin 18 emnas e da rinforzar la scolaziun da cader.

«L'armada da milissa è enragischada profundamain en la populaziun», di *Ja-*

kob Büchler, president dal comité contra. La populaziun haja confidenza en l'armada e stettia davos il model actual. La segirtad saja in bain impurtant. I saja reussi al comité contra da mussar ch'in «gea» a l'iniziativa avess chaschunà in effect da domino fin a l'aboliziun da l'armada.

Il resultat cler rinforzia l'armada, ha i num tar la Societad svizra d'uffiziers. «Il pievel stat davos la milissa e l'obligaziun da servetsch.» I saja uss da ponderar, sch'ins duess extender l'obligaziun era sin dunnas e sin esters cun la permissiun C.

En il Grischun èn 45 008 votants s'exprimids cunter l'iniziativa, 13 352 persuenter.



La decisiun dal pievel davart abolir il servetsch obligatoric è ina terrada per la GSoA.KY